

Diasabra, Januari 8 1994

80 CENT

Aña 3 / No.822

Mr. Jan Zwinkels nominá como Procurador General nobo di Aruba

"Golden Angel" di Ruth Croes a gana mahestuoso festival di trahe

ORANJESTAD- Un anochi mahestuoso y di fantasía sin igual, tabata loka a keda presentá Diahuebs y ayera nochi pa loka ta e International Carnaval Costume Festival den Cas di Cultura.

Algun creacion fenomenal y cu a hiba tur presente den un mundo di fantasía cu realmente a lanta en grande e spirito di carnaval.

Ruth Croes tabata impresionante cu su trahe "Golden Angel" for di momento cu luznan a dal riba su trahe y el a acapará atencion di tur esnan presente. Hunto cu e Brasileño Joao Azzi kende a presentá cu e fantasía di "Neptuno de Coral" e dos trahenan aki tabata muestra ganador for di nan promé salida.

Bon Dia Aruba a combersá cu Silvia Lourens kende a muestra satisfecho cu e gran logro aki y a muestra cu en total e trahe a hiba un gasto di 7500 florin na material únicamente. Pues sin conta e stafnan di hero cu a ser usá, sin conta e oranan di labor cu a hiba pa "construí e trahe aki y sin conta ainda tur otro aspecto cu ta completá un trahe precioso asina.

Un luna y mei a tuma pa completá e obra aki y e último dos simannan a traha 24 ora pa dia pa terminá e pieza luhoso aki.

Golden Angel fuera di a gana e premio máximo, el a logra tambe esun di originalidad y creatividad mientras cu Neptuno de Coral a keda na di dos lugar den tur tres categoría.

E festival di trahe aki a bin ta superando tur e edicionnan anterior y Bon Dia Aruba ta felicitá e organizadoman cu ta treciendo algo fabuloso riba escenario.

Cu e show fabuloso aki Camaval 40 a iniciá den un forma excepcional.

